

**Transformasi Politik, PRU13 Tajuk Utama Perbahasan Perhimpunan Umno
Bernama
05 November, 2012**

KUALA LUMPUR, 5 Nov (Bernama) -- Perhimpunan Agung Umno pada hujung bulan ini perlu memfokus kepada kesinambungan transformasi politik yang dilaksanakan oleh presiden parti di samping membincangkan persiapan menghadapi pilihan raya umum ke-13.

Naib Presiden Umno Datuk Seri Dr Ahmad Zahid Hamidi berkata jurucakap Umno yang mewakili negeri masing-masing harus menjurus perbahasan kepada dua perkara utama itu dan bukanlah masalah dalaman atau masalah di akar umbi.

"Sepatutnya perhimpunan kali ini perlu menjadi kesinambungan terhadap tranformasi politik yang dilakukan oleh Presiden Umno Datuk Seri Najib Tun Razak.

"Ini penting dalam mengekalkan perpaduan serta kesetiaan kepada kepimpinan parti dari peringkat akar umbi di samping memantapkan jentera pilihan raya sedia ada di negeri masing-masing," katanya dalam sidang media di Parlimen Isnin.

Ahmad Zahid, yang juga Menteri Pertahanan, berkata keutamaan adalah memenangi PRU dan jika perkara itu berjaya dilaksanakan parti, maka apa sahaja masalah dalaman akan terjawab.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=707165>